

O xacemento de Santa Comba e a minería de Covas volven ser motivo de análise

Preséntase mañá en Covas unha obra de investigación que resume catro anos de traballos

REDACCIÓN FERROL

Entre os anos 2010 e 2014, o grupo Historia Arqueoloxía e Análise Territorial, da Facultade de Humanidades, e o Centro Superior de Investigacións Científicas (CSIC) traballaron intensamente nunha obra que acaba de ver a luz “O xacemento de Santa Comba e a minería de Covas” (Edicións Embora), unha achega coordinada polos profesores Xosé-Lois Armada e Víctor Alonso. O volume preséntase mañá ás 20.00 horas no local da AVV de Covas coa presenza de Armada e do presidente da Sociedade Cultural Columba, José López Hermita.


TÉCNICAS MODERNAS

O profesor cariñés Xosé-Lois Armada, actualmente no Instituto de Arqueoloxía de Londres aínda que traballou para o CSIC na

época das investigacións en Covas, é un dos coordinadores do volume agora publicado e destaca o interese do libro.

“Os traballos centráronse no xacemento do castro, na ermida de Santa Comba e na mina de ouro romana situada apenas a un quilómetro e medio do castro. Fíxose con metodoloxía non invasiva, non excavamos e usamos técnicas superficiais, prospeccións xeofísicas con xeoradares, tomografía eléctrica, gradiómetros tipo fluxgate, e outras técnicas modernas que permiten detectar estruturas soterradas, a súa panorámica rápida e a extensión. Por exemplo, na illa, o castro está bastante deteriorado e o mellor conservado está na entrada. No caso da mina, usamos unha técnica de imaxes aéreas que eliminan os vexetais e árbores (o LiDAR aéreo), grazas ao que reconstrúes a topografía e podes medir as súas dimensións. Así, fíxose unha nova planimetría do castro e un estudo xeomorfolóxico”.

O libro tamén razona unha das súas propostas: un plan director para a súa investigación. “Propoñemos a creación dunha fundación coa participación do




Imaxe do castro e ermida de Santa Comba, espazos de permanente interese

JORGE MEIS

Armada: “Hai poucos espazos como este cun castro, ermida, mina de ouro romana e baterías de costa”

Concello, a asociación Columba, entidades privadas, etc. O lugar debe conservarse e estudarse porque é único. Sen baixar do coche un pode ver un castro nunha illa cunha ermida, unha mina de ouro romana e, máis actuais, varias baterías de costa: É algo único”.

En canto á datación do investigado, Armada destaca que “o castro debe ser do século III a.C., e a bandonouse no I d.C. Cremos que a mina de ouro romana tamén é desa época e o parón en



Xosé-Lois Armada, un dos coordinadores do traballo


ANA PERNAS

ámbolos dous lugares podería estar conectado. En canto á ermida e a necrópole baixo ela, xa

os documentos nos falan do ano 868 despos de varios séculos sen rastros”. ■

PRESENTACIÓN DO LIBRO DE CRISTINA RODRÍGUEZ CAHILL

A psicóloga Cristina Rodríguez Cahill presentou na AVV de Esmelle o seu libro “Los desafíos de los trastornos de la personalidad”, presentada polo xornalista Germán Castro. O volume fala do que son e como identificar os trastornos e en que consiste a súa manifestación.



A Banda de Gaitas “Ría de Ares” anima á inauguración da Feira Mariñeira da vila

REDACCIÓN FERROL

A Concellería de Cultura de Ares organiza desde hoxe e ata o próximo domingo a sexta edición da Feira Mariñeira, unha cita na que toman parte numerosos postos de artesanía e gastronomía repartidos ao longo do paseo marítimo. Como é habitual, a celebración conta cunha decoración temática chea de motivos relacionados co mundo do mar.

A feira contará tamén con diversos espectáculos en vivo de música ou demostracións de traballos de artesanía que amenizarán as xornadas festivas ata

o domingo. A inauguración de hoxe levarase a cabo ás seis da tarde cunha actuación no paseo da Banda de Gaitas “Ría de Ares”. Mañá tocaralle o turno á charanga Band de Varanda, ás sete do serán, e o domingo 23 a feira quedará clausurada coas actuacións do grupo de baile local “Areas do Mar”, ás 20.00 horas na praza da Igrexa.

CONCERTO DE FIN DE VERÁN

Ademais, como xa vén sendo habitual, a Igrexa de San Xosé de Ares acollerá mañá ás 20.00 horas o concerto de fin de verán a cargo da rondalla Lucero del Alba de Neda. ■

A asociación folclórica Orballo de Pontedeume actúa en Porto Santo e Madeira

REDACCIÓN FERROL

Dende o 21 de agosto ata o 30, a asociación folclórica Orballo de Pontedeume pon rumbo ao Portugal insular, en concreto á illa de Porto Santo, onde actuarán o día 22, e posteriormente á illa de Madeira, o 29, para participar en sendos Festivais Internacionais de Folclore. Cara a Madeira viaxan 39 membros da entidade, que leva ao grupo xuvenil, ao adulto e aos músicos. O festival do día 29, e a actuación eumesa polo tanto, será retransmitido para todo o país pola Radio Televisión Portuguesa. ■